

JADI ANGGOTA PALAPES JANGAN SEKADAR NAK PENUHI KOKURIKULUM UNIVERSITI

ALOR SETAR, 5 Nov (Bernama) -- Raja Muda Perlis, Tuanku Syed Faizuddin Putra Jamalullail bertitah pelajar universiti yang menyertai Pasukan Latihan Pegawai Simpanan (Palapes) perlu melunasi tanggungjawab mereka kepada negara.

"Namun realiti yang harus diterima ialah ramai dari kalangan Askar Wataniah ini sekadar 'hangat-hangat tahi ayam' terhadap tanggungjawab yang harus mereka lunasi sebagai seorang anggota.

"Ada juga yang menganggotai Palapes hanya sekadar untuk memenuhi kokurikulum universiti. Hasilnya setelah tamat pengajian, tauliah yang disandang dibuang entah ke mana. Apa yang penting adalah komitmen individu yang menyahut cabaran ini mestilah jujur dan dengan rela hati ingin berbakti kepada negara," titah baginda.

Baginda selaku Canselor Universiti Malaysia Perlis (UniMAP) bertitah demikian pada majlis Santapan Malam Rejimental Sempena Pertauliahan Diraja Pegawai Kadet Palapes UniMAP Ke-10, di sini malam tadi.

Berangkat sama Raja Puan Muda Perlis, Tuanku Hajah Lailatul Shahreen Akashah Khalil yang juga Pro Canselor UniMAP.

Tuanku Syed Faizuddin bertitah penubuhan dan pembangunan Askar Wataniah sebagai ketumbukan barisan kedua pertahanan negara yang ampuh tidak boleh diragui kerana ia mampu menggerakkan jentera sokongan kepentingan awam semasa negara berada dalam saat genting.

Baginda bertitah seiring melangkah ke tahun 2020, kehidupan yang dilalui kian mencabar dan apa yang menjadi kebimbangan negara ialah kesedaran daripada generasi muda dalam memelihara kedaulatannya.

"Anggota-anggota Palapes perlu mengambil kira beberapa langkah termasuk mengamalkan semangat patriotisme dan mengekalkan hubungan baik

sesama rakan berlainan bangsa dalam pasukan supaya dapat menempuhi cabaran yang akan mendatang," titah baginda.

Pada majlis itu baginda turut menyampaikan hadiah kepada penerima Anugerah Pegawai Kadet Terbaik (Keseluruhan) UniMAP 2017, Leftenan Muda Lai Ning Jing, Nur Hikmah Abdul Rasid (Terbaik Ketenteraan), Yew Lie Jie (Terbaik Akademik-Diploma) dan Low Yong Chin (Terbaik Akademik-Ijazah).

Dikeluarkan oleh;

Unit Perhubungan Media UniMAP